

中阿含經

第九

二百六
薄九

49360 4



元錄九朝西子二月日重脩

皇國華國 帝新銀昌

佛日增輝 懋輪常轉

山城州天安寺法金剛院置



4

4

中阿含經卷第九

東晉罽賓三藏瞿曇僧伽提婆譯

薄

未曾有法品地動經第五

初一日誦

我聞如是一時佛遊金剛國城名曰地尔時
彼地大動地大動時四面大風起四方彗星
出屋舍墻壁皆崩壞盡於是尊者阿難見地
大動地大動時四面大風起四方彗星出屋
舍墻壁皆崩壞盡尊者阿難見已恐怖舉身
毛豎往詣佛所稽首礼足却住一面白曰世
尊今地大動地大動時四面大風起四方彗
星出屋舍墻壁皆崩壞盡於是世尊語尊者
阿難曰如是阿難今地大動如是阿難地大



動時四面大風起四方彗星出屋舍墻壁皆
崩壞盡尊者阿難白曰世尊有幾因緣令地
大動地大動時四面大風起四方彗星出屋
舍墻壁皆崩壞盡世尊荅曰阿難有三因緣
令地大動地大動時四面大風起四方彗星
出屋舍墻壁皆崩壞盡云何為三阿難此地
止水上水止風上風依於空阿難有時空中
大風起風起則水擾水擾則地動是謂第一
因緣令地大動地大動時四面大風起四方
彗星出屋舍墻壁皆崩壞盡復次阿難比丘
有大如意足有大威德有大福祐有大威神
心自在如意足彼於地作小想於水作無量

想彼因是故此地隨所欲隨其意擾復擾振
復振護比丘天亦復如是有大如意足有大
威德有大福祐有大威神心自在如意足彼
於地作小想於水作無量想彼因是故此地
隨所欲隨其意擾復擾振復振是謂第二因
緣令地大動地大動時四面大風起四方彗
星出屋舍墻壁皆崩壞盡復次阿難若如來
不久過三月已當般涅槃由是之故令地大
動地大動時四面大風起四方彗星出屋舍
墻壁皆崩壞盡是謂第三因緣令地大動地
大動時四面大風起四方彗星出屋舍墻壁
皆崩壞盡於是尊者阿難聞是語已悲泣涕

零叉手向佛白曰世尊甚奇甚特如來無所
著等正覺成就功德得未曾有法所以者何
謂如來不久過三月已當般涅槃是時令地
大動地大動時四面大風起四方彗星出屋
舍墻壁皆崩壞盡世尊語尊者阿難曰如是
阿難如是阿難甚奇甚特如來無所著等正
覺成就功德得未曾有法所以者何謂如來
不久過三月已當般涅槃是時令地大動地
大動時四面大風起四方彗星出屋舍墻壁
皆崩壞盡復次阿難我往詣無量百千刹利
衆共坐談論令可彼意共坐定已如彼色像
我色像亦然如彼音聲我音聲亦然如彼威

儀禮節我威儀禮節亦然若彼問義我答彼
義復次我為彼說法勸發渴仰成就歡喜無
量方便為彼說法勸發渴仰成就歡喜已即
彼處沒我既沒已彼不知誰為人為非人阿
難如是甚奇甚特如來無所著等正覺成就
功德得未曾有法如是梵志眾居士眾沙門
眾阿難我往詣無量百千四王天眾共坐談
論今可彼意共坐定已如彼色像我色像亦
然如彼音聲我音聲亦然如彼威儀禮節我
威儀禮節亦然若彼問義我答彼義復次我
為彼說法勸發渴仰成就歡喜無量方便為
彼說法勸發渴仰成就歡喜已即彼處沒我

既沒已彼不知誰爲天爲異夫阿難如是甚
竒甚特如來無所著等正覺成就功德得未
曾有法如是三十三天焰摩天兜率哆天化
樂天他化樂天梵身天梵富樓天少光天無
量光天晃昱天少淨天無量淨天遍淨天無
罣礙天受福天果實天無煩天無熱天善見
天善現天阿難我往詣無量百千色究竟天
衆共坐談論令可彼意共坐定已如彼色像
我色像亦然如彼音聲我音聲亦然如彼威
儀札節我威儀札節亦然若彼問義我答彼
義復次我爲彼說法勸發渴仰成就歡喜無
量方便爲彼說法勸發渴仰成就歡喜已即

彼處沒我既沒已彼不知誰為天為異天阿
難如是甚竒甚特如來無所著等正覺成就
功德得未曾有法佛說如是尊者阿難及諸
比丘聞佛所說歡喜奉行

地動經第五竟

未曾有法品瞻波經第六

初一日誦

我聞如是一時佛遊瞻波在恒伽池邊尔時
世尊月十五日說從解脫時於比丘衆前敷
座而坐世尊坐已即便入定以他心智觀察
衆心觀衆心已至初夜竟默然而坐於是有一
比丘即從坐起偏袒著衣叉手向佛白曰
世尊初夜已訖佛及比丘衆集坐來久唯願

世尊說從解脫尔時世尊默然不答於是世尊復至中夜默然而坐彼一比丘再從坐起偏袒著衣叉手向佛白曰世尊初夜已過中夜將訖佛及比丘衆集坐來久唯願世尊說從解脫世尊亦再默然不答於是世尊復至後夜默然而坐彼一比丘三從坐起偏袒著

衣叉手向佛白曰世尊初夜既過中夜復訖後夜垂盡將向欲明明出不久佛及比丘衆集坐極久唯願世尊說從解脫尔時世尊告彼比丘於此衆中有一比丘已爲不淨彼時尊者大目犍連亦在衆中於是尊者大目犍連便作是念世尊爲何比丘而說此衆中有

一比丘已爲不淨我寧可入如其像定以如
其像定他心之智觀察衆心尊者大目捷連
即入如其像定以如其像定他心之智觀察
衆心尊者大目捷連便知世尊所爲比丘說
此衆中有一比丘已爲不淨於是尊者大目
捷連即從定起至彼比丘前牽臂將出開門
置外癡人遠去莫於此住不復得與比丘衆
會從今已去非是比丘閉門下鑰還詣佛所
稽首佛足却坐一面向日出世尊所爲比丘說
此衆中有一比丘已爲不淨我已逐出世尊
初夜旣過中夜復訖後夜垂盡將向欲明明
出不久佛及比丘衆集坐極久唯願世尊說

從解脫世尊告曰大目犍連彼愚癡人當得
大罪觸燒世尊及比丘衆大目犍連若使如
來在不淨衆說從解脫者彼人則便頭破七
分是故大目犍連汝等從今已後說從解脫
如來不復說從解脫所以者何大目犍連如
彼大海從下至上周迴漸廣均調轉上以成
於岸其水常滿未曾流出大目犍連我正法
律亦復如是漸作漸學漸盡漸教大目犍連
若我正法律漸作漸學漸盡漸教者是謂我
正法律中未曾有法復次大目犍連如大海
潮未曾失時大目犍連我正法律亦復如是
爲比丘比丘尼優婆塞優婆夷施設禁戒諸

族姓子乃至命盡終不犯戒大目捷連若我
正法律爲比丘比丘尼優婆塞優婆夷施設
禁戒諸族姓子乃至命盡終不犯戒者是謂
我正法律中未曾有法復次大目捷連如大
海水甚深無底極廣無邊大目捷連我正法
律亦復如是諸法甚深甚深無底極廣無邊
大目捷連若我正法律諸法甚深甚深無底
極廣無邊者是謂我正法律中未曾有法復
次大目捷連如海水鹹皆同一味大目捷連
我正法律亦復如是無欲爲味覺味息味及
道味大目捷連若我正法律無欲爲味覺味
息味及道味者是謂我正法律中未曾有法

復次大目捷連如大海中多有珍寶無量貴
異種種珍琦充滿其中珍寶名者謂金銀水
精瑠璃摩尼真珠碧玉白珂螺壁珊瑚琥珀
碼碯瑇瑁赤石琰珠大目捷連我正法律亦
復如是多有珍寶無量貴異種種珍琦充滿
與中珍寶名者謂四念處四正勤四如意足
五根五力七覺枝八枝聖道大目捷連若我
正法律多有珍寶無量貴異種種珍琦充滿
其中珍寶名者謂四念處四正勤四如意足
五根五力七覺支八支聖道者是謂我正法
律中未曾有法復次大目捷連如大海中大
神所居大神名者謂阿脩羅捷塔和羅刹魚

摩竭龜鼉婆留泥帝麁帝麁伽羅提帝麁伽
羅復次大海中甚竒甚特衆生身體有百由
延有二百由延有三百由延有至七百由延
身皆居海中大目捷連我正法律亦復如是
聖衆大神皆居其中大神名者謂阿羅訶向
阿羅訶阿那含向阿那含斯陀含向斯陀含
須陀洹向須陀洹大目捷連若我正法律聖
衆大神皆居其中大神名者謂阿羅訶向阿
羅訶阿那含向阿那含斯陀含向斯陀含須
陀洹向須陀洹者是謂我正法律中未曾有
法復次大目捷連如大海清淨不受死屍若
有命終者過夜風便吹著岸上大目捷連我

正法律亦復如是聖衆清淨不受死屍若有
不精進人惡生非梵行稱梵行非沙門稱沙
門彼雖隨在聖衆之中然去聖衆遠聖衆亦
復去離彼遠大目捷連若我正法律聖衆清
淨不受死屍若有不精進人惡生非梵行稱
梵行非沙門稱沙門彼雖隨在聖衆之中然
去聖衆遠聖衆亦復去離彼遠者是謂我正
法律中未曾有法復次大目捷連如彼大海
閻浮洲中有五大河一曰恒伽二曰搖尤那
三曰舍牢浮四曰阿夷羅婆提五曰摩企皆
入大海及大海中龍水從空雨墮滴如車軸
是一切水不能令大海有增減也大目捷連

我正法律亦復如是利利種族姓子剃除鬚
髮著袈裟衣至信捨家無家學道不移
動心解脫自作證成就遊大目捷連不移
動心解脫於我正法律中無增無減如是
梵志種居士種工師種族姓子剃除鬚
髮著袈裟衣至信捨家無家學道不移
動心解脫自作證成就遊大目捷連不移
動心解脫於我正法律中無增無減如是
梵志種居士種工師種族姓

子剃除鬚髮著袈裟衣至信捨家無家學道
不移動心解脫自作證成就遊大目捷連不
移動心解脫於我正法律中無增無減者是
謂我正法律中未曾有法佛說如是尊者大
目捷連及諸比丘聞佛所說歡喜奉行

瞻波經第六竟

未曾有法品郁伽長者經第七

初一日誦

我聞如是一時佛遊鞞舍離住大林中尔時
郁伽長者唯婦女侍從在諸女前從鞞舍離
出於鞞舍離大林中間唯作女妓娛樂如王
於是郁伽長者飲酒大醉捨諸婦女至大林
中郁伽長者飲酒大醉遙見世尊在林樹間

端正姝好猶星中月光曜暎曠晃若金山相
好具足威神巍巍諸根寂定無有蔽礙成就
調御息心靜嘿彼見佛已即時醉醒郁伽長
者醉既醒已便往詣佛稽首禮足却坐一面
介時世尊為彼說法勸發渴仰成就歡喜無
量方便為彼說法勸發渴仰成就歡喜已如
諸佛法先說端正法聞者歡悅謂說施說戒
說生天法毀訾欲為灾患生死為穢稱嘆無
欲為妙道品白淨世尊為彼說如是法已佛
知彼有歡喜心具足心柔軟心堪耐心昇上
心一向心無疑心無盖心有能有力堪受正
法謂如諸佛說正法要世尊即為彼說苦習

滅道彼時郁伽長者即於坐中見四聖諦苦
習滅道猶如白素易染爲色郁伽長者亦復
如是即於坐中見四聖諦苦習滅道於是郁
伽長者已見法得法覺白淨法斷疑度惑更
無餘尊不復從他無有猶豫已住果證於世
尊法得無所畏即從坐起爲佛作禮白曰世

尊我今自歸於佛法及比丘衆唯願世尊受
我爲優婆塞從今日始終身自歸乃至命盡
世尊我從今日從世尊自盡形壽梵行爲首
受持五戒郁伽長者從世尊自盡形壽梵行
爲首受持五戒已誓首佛足繞三匝而去還
歸其家即集諸婦人集已語曰汝等知不我

從世尊自盡形壽梵行爲首受持五戒汝等
欲得住於此者便可住此行施作福若不欲
住者各自還歸若汝欲得嫁者我當嫁汝於
是最大夫夫人白郁伽長者若尊從佛自盡形
壽梵行爲首受持五戒者便可以我與彼某
甲郁伽長者即爲呼彼人以左手執大夫人
臂右手執金澡灌語彼人曰我今以大夫人
與汝作婦彼人聞已便大恐怖身毛皆豎白
郁伽長者長者欲殺我耶長者欲殺我耶長
者荅曰我不殺汝然我從佛自盡形壽梵行
爲首受持五戒是故我以最大夫人與汝作
婦耳郁伽長者已與大夫人當與與時都無

悔心是時世尊無量百千大眾圍繞於中咨
嗟稱歎郁伽長者郁伽長者有八未曾有法
於是有一比丘過夜平旦著衣持鉢往詣郁
伽長者家郁伽長者遙見比丘來即從座起
偏袒著衣叉手向比丘白曰尊者善來尊者
久不來此願坐此牀彼時比丘即坐其牀郁
伽長者禮比丘足却坐一面比丘告曰長者
汝有善利有大功德所以者何謂世尊為汝
無量百千大眾圍繞於中咨嗟稱嘆郁伽長
者有八未曾有法長者汝有何法郁伽長者
荅比丘曰尊者世尊初不說異然我不知世
尊為何因說但尊者聽謂我有法一時世尊

遊鞞舍離住大林中尊者我於尔時唯婦女
侍從我最在前出鞞舍離於鞞舍離大林中
間唯作女妓娛樂如王尊者我於尔時飲酒
大醉捨諸婦女至大林中尊者我時大醉遙
見世尊在林樹間端正姝好猶星中月光曜
暉曄晃若金山相好具足威神巍巍諸根寂
定無有蔽礙成就調御息心靜默我見佛已
即時醉醒尊者我有是法比丘歎曰長者若
有是法甚竒甚特尊者我不但有是法復次
尊者我醉醒已便往詣佛稽首礼足却坐一
面世尊爲我說法勸發渴仰成就歡喜無量
方便爲我說法勸發渴仰成就歡喜已如諸

佛法先說端正法聞者歡悅謂說施說戒說
生天法毀些欲為灾患生死為穢稱嘆無欲
為妙道品白淨世尊為我說如是法已佛知
我有歡喜心具足心柔順心堪耐心昇上心
一向心無疑心無蓋心有能有力堪受正法
謂如諸佛說正法要世尊即為我說苦習滅
道我亦時即於坐中見四聖諦苦習滅道猶
如白素易染為色尊者我亦如是即於坐中
見四聖諦苦習滅道尊者我有是法比丘歎
曰長者若有是法甚奇甚特尊者我不但有
是法復次尊者我見法得法覺白淨法斷疑
度惑更無餘尊不復從他無有猶豫已住果

證於世尊法得無所畏尊者我今時即從坐
起稽首佛足世尊我今自歸於佛法及比丘
衆唯願世尊受我爲優婆塞從今日始終身
自歸乃至命盡世尊我從今日從世尊自盡
形壽梵行爲首受持五戒尊者若我從世尊
自盡形壽梵行爲首受持五戒未曾知已犯

戒尊者我有是法比丘歎曰長者若有是法
甚奇甚特尊者我不但有是法復次尊者我
今時從世尊自盡形壽梵行爲首受持五戒
已稽首佛足繞三巾而去還歸其家集諸婦
女集已語曰汝等知不我從世尊自盡形壽
梵行爲首受持五戒汝等欲得住於此者便

可住此行施作福若不欲住者各自還歸若
汝欲得嫁者我當嫁汝於是最大夫人來白
我曰若尊從佛自盡形壽梵行爲首受持五
戒者便可以我與彼某甲尊者我亦時卽爲
呼彼人以左手執大夫人臂右手執金澡灌
語彼人曰我今以大夫人與汝作婦彼人聞
已便大恐怖身毛皆豎而白我曰長者欲殺
我耶長者欲殺我耶尊者我語彼曰不欲殺
汝然我從佛自盡形壽梵行爲首受持五戒
是故我以最大夫人與汝作婦耳尊者我已
與大夫人當與與時都無悔心尊者我有是
法比丘嘆曰長者若有是法甚奇甚特尊者

我不但有是法復次尊者我詣衆園時若初見一比丘便爲作礼若彼比丘經行者我亦隨經行若彼坐者我亦於一面坐坐已聽法彼尊爲我說法我亦爲彼尊說法彼尊問我事我亦問彼尊事彼尊答我事我亦答彼尊事尊者我未曾憶輕慢上中下長老上尊比丘尊者我有是法比丘歎曰長者若有是法甚竒甚特尊者我不但有是法復次尊者我在比丘衆行布施時天住虛空而告我曰長者此是阿羅訶此是向阿羅訶此是阿那含此是向阿那含此是斯陀含此是向斯陀含此是須陀洹此是向須陀洹此精進此不精進

尊者我施比丘衆時未曾憶有分別意尊者
我有是法比丘嘆曰長者若有是法甚竒甚
特尊者我不但有是法復次尊者我在比丘衆
行布施時有天住虛空中而告我曰長者有
如來無所著等正覺世尊善說法如來聖衆
善趣向尊者我不從彼天信不從彼欲樂不
從彼所聞但我自有淨智知有如來無所著
等正覺世尊善說法如來聖衆善趣向尊者
我有是法比丘歎曰長者若有是法甚竒甚
特尊者我不但有是法復次尊者謂佛所說
五下分結貪欲瞋恚身見戒取疑我見此五
無一不盡今縛我還此世間入於胎中尊者

我有是法比丘歎曰長者若有是法甚奇甚
特郁伽長者白比丘曰願尊在此食比丘為
郁伽長者故默然受請郁伽長者知彼比丘
默然受已即從座起自行澡水以極淨美種
種豐饒食噉含消自手斟酌令得飽滿食訖
收器行澡水竟持一小牀別坐聽法比丘為
長者說法勸發渴仰成就歡喜無量方便為
彼說法勸發渴仰成就歡喜已從座起去往
詣佛所稽首礼足却坐一面謂與郁伽長者
本所共論盡向佛說於是世尊告諸比丘曰
我以是故咨嗟稱歎郁伽長者有八未曾有
法佛說如是彼諸比丘聞佛所說歡喜奉行

郁伽長者經第七竟

未曾有法品郁伽長者經第八

初一日誦

我聞如是一時佛般涅槃後不久衆多上尊
長老比丘遊鞞舍離在獼猴水邊高樓臺觀
尔時郁伽長者施設如是大施謂與遠來客
食與行人病人瞻病者食常設粥食常設飯

食供給守僧園人常請二十衆食五日都請
比丘衆食施設如是大施復於海中有一船
舩載滿貨還價直百千一時没失衆多上尊
長老比丘聞郁伽長者施設如是大施謂與遠
來客食與行人病人瞻病者食常設粥食常
設飯食供給守僧園人常請二十衆食五日都

請比丘衆食聞已共作是議諸賢誰能往語
郁伽長者長者可止勿復布施長者後自當
知彼作是念尊者阿難是佛侍者受世尊教
佛所稱譽及諸智梵行人尊者阿難能往語
郁伽長者長者可止勿復布施長者後自當
知諸賢我等共往詣尊者阿難所說如此事
於是衆多上尊長老比丘往詣尊者阿難所
共相問評却坐一面語曰賢者阿難知不郁
伽長者施設如是大施謂與遠來客食與行
人病人瞻病者食常設粥食常設飯食供給
守僧園人常請二十衆食五日都請比丘衆食
施設如是大施復於海中有船舶載滿貨

還價直百千一時沒失我等共作是議誰能
往語郁伽長者而作是語長者可止勿復布
施長者後自當知復作是念尊者阿難是佛
侍者受世尊教佛所稱譽及諸智梵行人尊
者阿難能往語郁伽長者長者可止勿復布
施長者後自當知賢者阿難可往詣郁伽長
者而語彼曰長者可上勿復布施長者後自
當知尊者阿難白諸長老上尊比丘曰諸尊
郁伽長者其性嚴整若我自爲語者儻能致
大不喜諸尊我爲誰語諸長老上尊比丘荅
曰賢者稱比丘衆語稱比丘衆語已彼無所
言尊者阿難便默然受諸長老上尊比丘命

於是諸長老上尊比丘知尊者阿難默然許已
即從坐起繞尊者阿難各自還去尊者阿難
過夜平旦著衣持鉢往詣郁伽長者家郁伽
長者遙見尊者阿難來即從座起偏袒著衣
叉手向尊者阿難白曰善來尊者阿難尊者
阿難久不來此願坐此牀尊者阿難即坐其
牀郁伽長者禮尊者阿難足却坐一面尊者
阿難告曰長者知不長者施設如是大施與
遠來客食與行人病人瞻病者食常設粥食
常設飯食供給守僧園人常請二十衆食五
日都請比丘衆食施設如是大施復於海中
有一船舩載滿貨還價直百千一時沒失長者

可止勿復布施長者後自當知長者白曰尊者阿難爲是誰語尊者阿難荅曰長者我宣比丘衆語長者白曰若尊者阿難宣比丘衆語者無所復論若自語者或能致大不喜尊者阿難若我如是捨與如是惠施一切財物皆悉竭盡但使我願滿如轉輪王願尊者阿難問曰長者云何轉輪王願長者荅曰尊者阿難村中貧人作是念令我於村中最富即是彼願村中富人作是念令我於邑中最富即是彼願邑中富人作是念令我於城中最富即是彼願城中富人作是念令我於城中作宗正即是彼願城中宗正作是念令我作

國相即是彼願國相作是念令我作小王即是彼願小王作是念令我作轉輪王即是彼願轉輪王作是念令我如族姓子所為剃除鬚髮著袈裟衣至信捨家無家學道者謂無上梵行訖令我於現法中自知自覺自作證成就遊生已盡梵行已立所作已辦不更受

有知如真即是彼願尊者阿難若我如是捨與如是惠施一切財物皆悉竭盡但使我願滿如轉輪王願尊者阿難我有是法尊者阿難嘆曰長者若有是法甚奇甚特復次尊者阿難我不但有是法尊者阿難我詣僧園時若初見一比丘便為作禮若彼比丘經行者

我亦隨經行若彼坐者我亦於一面坐坐已聽
法彼尊爲我說法我亦爲彼尊說法彼尊問
我事我亦問彼尊事彼尊答我事我亦答彼
尊事尊者阿難我未曾憶輕慢上中下長老
上尊比丘尊者阿難我有是法尊者阿難嘆
曰長者若有是法甚竒甚特復次尊者阿難
我不但有是法尊者阿難我在比丘衆行布
施時天住虛空而告我曰長者此是阿羅訶
此是向阿羅訶此是阿那含此是向阿那含
此是斯陀含此是向斯陀含此是須陀洹此
是向須陀洹此精進此不精進尊者阿難我
施比丘衆時未曾憶有分別意尊者阿難我

有是法尊者阿難嘆曰長者若有是法甚奇
甚特復次尊者阿難我不但有是法尊者阿
難我在比丘衆行布施時天住虛空而告我
曰長者有如來無所著等正覺世尊善說法
如來聖衆善趣向我不從彼天信不從彼欲
樂不從彼所聞但我自有淨智知有如來無
所著等正覺世尊善說法如來聖衆善趣向
尊者阿難我有是法尊者阿難歎曰長者若
有是法甚奇甚特復次尊者阿難我不但有
是法尊者阿難我離欲離惡不善之法至得
第四禪成就遊尊者阿難我有是法尊者阿
難歎曰長者若有是法甚奇甚特於是郁伽

長者白曰尊者阿難願在此食尊者阿難爲
郁伽長者故默然受請郁伽長者知尊者阿
難默然受已即從座起自行澡水以極淨美
種種豐饒食噉含消自手斟酌令得飽滿食
訖收器行澡水已取一小牀別坐聽法尊者
阿難爲彼說法勸發渴仰成就歡喜無量方
便爲彼說法勸發渴仰成就歡喜已從座起
去尊者阿難所說如是郁伽長者聞尊者阿
難所說歡喜奉行

郁伽長者經第八竟

未曾有法品
以者經第九

初一日誦

我聞如是一時佛遊阿羅鞞伽羅在和林中

尔時手長者與五百大長者俱往詣佛所。瞽
首礼足却坐。一面五百長者亦礼佛足却坐。
一面世尊告曰：手長者。汝今有此極大衆長
者。汝以何法攝此大衆。彼時手長者白曰：世
尊。謂有四事攝如世尊說。一者惠施。二者愛
言。三者以利。四者等利。世尊我以此攝於大
衆。或以惠施。或以愛言。或以利。或以等利。世
尊。嘆曰：善哉。善哉。手長者。汝能以如法攝於
大衆。又以如門攝於大衆。以如因緣攝於大
衆。手長者。若過去有沙門梵志。以如法攝大
衆者。彼一切即此四事攝於中。或有餘手長
者。若有未來沙門梵志。以如法攝大衆者。彼

一切即此四事攝於中或有餘手長者若有
現在沙門梵志以如法攝大眾者彼一切即
此四事攝於中或有餘於是世尊爲手長者
說法勸發渴仰成就歡喜無量方便爲彼說
法勸發渴仰成就歡喜已默然而住於是手
長者佛爲說法勸發渴仰成就歡喜已即從

坐起爲佛作禮繞三匝而去還歸其家到外
門已若有人者盡爲說法勸發渴仰成就歡
喜中門內門及入在內若有人者盡爲說法
勸發渴仰成就歡喜已昇堂敷牀結跏趺坐
心與慈俱遍滿一方成就遊如是二三四方
四維上下普周一切心與慈俱無結無怨無

志無諍極廣甚大無量善修遍滿一切世間
成就遊如是悲喜心與捨俱無結無怨無志
無諍極廣甚大無量善修遍滿一切世間成
就遊介時三十三天集在法堂咨嗟稱歎手
長者諸賢手長者有大善利有大功德所以
者何彼手長者佛爲說法勸發渴仰成就歡
喜已即從座起爲佛作禮繞三匝而去還歸
其家到外門已若有人者盡爲說法勸發渴
仰成就歡喜中門內門及入在內若有人者
盡爲說法勸發渴仰成就歡喜已昇堂敷牀
結跏趺坐心與慈俱遍滿一方成就遊如是
二三四方四維上下普周一切心與慈俱無

結無怨無恚無諍極廣甚大無量善修遍備
一切世間成就遊如是悲喜心與捨俱無結
無怨無恚無諍極廣甚大無量善修遍滿一
切世間成就遊於是毗沙門大天王色像巍
巍光曜晬晬夜將向旦往詣手長者家告曰
長者汝有善利有大功德所以者何今三十
三天為長者集在法堂咨嗟稱嘆手長者有
大善利有大功德所以者何諸賢彼手長者
佛為說法勸發渴仰成就歡喜已即從座起
為佛作禮繞三帀而去還歸其家到外門已
若有人者盡為說法勸發渴仰成就歡喜中
門內門及入在內若有人者盡為說法勸發

渴仰成就歡喜已昇堂敷牀結跏趺坐心與
慈俱遍滿一方成就遊如是二三四方四維上
下普周一切心與慈俱無結無怨無恚無諍極
廣甚大無量善修遍滿一切世間成就遊如
是悲喜心與捨俱無結無怨無恚無諍極廣
甚大無量善修遍滿一切世間成就遊是時
手長者默然不語不觀不視毗沙門大天王
所以者何以尊重定守護定故今時世尊於
無量百千衆中咨嗟稱歎手長者手長者有
七未曾有法彼手長者我爲說法勸發渴仰
成就歡喜已即從座起爲我作禮繞三匝而
去還歸其家到外門已若有人者盡爲說法

勸發渴仰成就歡喜中門內門及入在內若
有人者豈說法勸發渴仰成就歡喜已昇
堂敷牀結跏趺坐心與慈俱遍滿一方成就
遊如是二三四方四維上下普周一切心與
慈俱無結無怨無恚無諍極廣甚大無量善
修遍滿一切世間成就遊如是悲喜心與捨
俱無結無怨無恚無諍極廣甚大無量善修
遍滿一切世間成就遊今三十三天為彼集在
法堂咨嗟稱歎手長者有大善利有大功德
所以者何諸賢彼手長者佛為說法勸發渴
仰成就歡喜已即從座起為佛作禮繞三匝
而去還歸其家到外門已若有人者盡為說

法勸發渴仰成就歡喜中門內門及入在內
若有人者盡爲說法勸發渴仰成就歡喜已
昇堂敷牀結跏趺坐心與慈俱遍滿一方成
就遊如是二三四方四維上下普周一切心
與慈俱無結無怨無恚無諍極廣甚大無量
善修遍滿一切世間成就遊如是悲喜心與
捨俱無結無怨無恚無諍極廣甚大無量善
修遍滿一切世間成就遊今毗沙門大天王
色像巍巍光曜晬晬夜將向旦詣手長者家
告曰長者汝有善利有大功德所以者何今
三十三天爲長者集在法堂咨嗟稱歎手長者
有大善利有大功德所以者何諸賢彼手長

者佛爲說法勸發渴仰成就歡喜已即從座起爲佛作禮繞三帀而去還歸其家到外門已若有人者盡爲說法勸發渴仰成就歡喜中門內門及入在內若有人者盡爲說法勸發渴仰成就歡喜已昇堂敷牀結跏趺坐心與慈俱遍滿一方成就遊如是二三四方四維上下普周一切心與慈俱無結無怨無恚無諍極廣甚大無量善修遍滿一切世間成就遊如是悲喜心與捨俱無結無怨無恚無諍極廣甚大無量善修遍滿一切世間成就遊於是有一比丘過夜平旦著衣持鉢往詣手長者家手長者遙見比丘來即從座起叉

手向比丘白曰尊者善來尊者久不來此願
坐此牀彼時比丘即坐其牀手長者禮比丘
足却坐一面比丘告曰長者汝有善利有大
功德所以者何世尊爲汝於無量百千衆中
咨嗟稱嘆手長者手長者有七未曾有法手
長者我爲說法勸發渴仰成就歡喜已即從
坐起爲我作禮繞三匝而去還歸其家到外
門已若有人者盡爲說法勸發渴仰成就歡
喜中門內門及入在內若有人者盡爲說法
勸發渴仰成就歡喜已昇堂敷牀結跏趺坐
心與慈俱遍滿一方成就遊如是二二四方
四維上下普周一切心與慈俱無結無怨無

志無諍極廣甚大無量善修遍滿一切世間
成就遊如是悲喜心與捨俱無結無怨無志
無諍極廣甚大無量善修遍滿一切世間成
就遊今三十三天爲彼集在法堂咨嗟稱歎手
長者有大善利有大功德所以者何諸賢彼
手長者佛爲說法勸發渴仰成就歡喜已即
從座起爲佛作禮繞三匝而去還歸其家到
外門已若有人者盡爲說法勸發渴仰成就
歡喜中門內門及入在內若有人者盡爲說
法勸發渴仰成就歡喜已昇堂敷牀結跏趺
坐心與慈俱遍滿一方成就遊如是二三四
方四維上下普周一切心與慈俱無結無怨

無恚無諍極廣甚大無量善修遍滿一切世
間成就遊如是悲喜心與捨俱無結無怨無
恚無諍極廣甚大無量善修遍滿一切世間
成就遊於是毗沙門大天王色像巍巍光曜
曄曄夜將向旦詣手長者家告曰長者汝有
善利有大功德所以者何今三十三天爲手長
者集在法堂咨嗟稱歎手長者有大善利有
大功德所以者何諸賢彼手長者佛爲說法勸
發渴仰成就歡喜已即從座起爲佛作札繞
三帀而去還歸其家到外門已若有人者盡
爲說法勸發渴仰成就歡喜中門內門及入
在內若有人者盡爲說法勸發渴仰成就歡

喜已昇堂敷牀結跏趺坐心與慈俱遍滿一
方成就遊如是二三四方四維上下普周一
切心與慈俱無結無怨無恚無諍極廣甚大
無量善修遍滿一切世間成就遊如是悲喜
心與捨俱無結無怨無恚無諍極廣甚大無
量善修遍滿一切世間成就遊是時手長者
默然不語亦不觀視毗沙門大天王所以者
何以尊重定守護定故於是手長者白比丘
曰尊者是時無白衣耶比丘荅曰無白衣也
又問曰若有白衣者當有何咎長者荅曰尊
者或有不信世尊語者彼當長夜不義不忍
生極惡處受苦無量若有信佛語者彼因此

事故便能尊重恭敬礼事我尊者我亦不欲
令尔也尊者願在此食彼比丘為手長者故
默然受請手長者知彼比丘默然受已即從
座起自行澡水以極淨美種種豐饒食噉含
消自手斟酌令得飽滿食訖收器行澡水已
取一小牀別坐聽法彼比丘為手長者說法
勸發渴仰成就歡喜無量方便為彼說法勸
發渴仰成就歡喜已從座起去往詣佛所稽
首礼足却坐一面謂與手長者本所共論盡
向佛說於是世尊告諸比丘我以是故稱說
手長者有七未曾有法復次汝等當知手長
者復有第八未曾有法手長者無求無欲佛

說如是彼諸比丘聞佛所說歡喜奉行

手長者經第九竟

未曾有法品手長者經第十

初一日誦

我聞如是一時佛遊阿羅鞞伽羅在和林中
尔時世尊告諸比丘手長者有八未曾有法
云何爲八手長者有少欲有信有慚有愧有
進有念有定有慧手長者有少欲者此何因
說手長者自少欲不欲令他知我少欲有信
有慚有愧精進有念有定有慧手長者自有
慧不欲令他知我有慧手長者有少欲者因
此故說手長者有信者此何因說手長者得
信堅固深著如來信根已立終不隨外沙門

梵志若天魔梵及餘世間手長者有信者因
此故說手長者有慙者此何因說手長者常
行慙耻可慚知慙惡不善法穢汙煩惱受諸
惡報造生死本手長者有慙者因此故說手
長者有愧者此何因說手長者常行羞愧可
愧知愧惡不善法穢汙煩惱受諸惡報造生
死本手長者有愧者因此故說手長者有精進
者此何因說手長者常行精進除惡不善修
諸善法恒自起意專一堅固爲諸善本不捨
方便手長者有精進者因此故說手長者有
念者此何因說手長者觀內身如身觀內覺
心法如法手長者有念者因此故說手長者

有定者此何因說手長者離欲離惡不善之
法至得第四禪成就遊手長者有定者因此
故說手長者有慧者此何因說手長者修行
智慧觀興衰法得如此智聖慧明達分別曉
了以正盡苦手長者有慧者因此故說手長
者有八未曾有法者因此故說佛說如是彼
諸比丘聞佛所說歡喜奉行

手長者經第十竟

中阿含未曾有法品第四竟

初一日誦

中阿含經卷第九

薄

彗星

上音遂又旬歲反一筵也

涕零

上音體

替

下泣

下淚

曰

下

鑰

也

下

正

作

鑰

閨

一

船

舡

大

上

音

白

一



